



Ons vermeerder God se vreugde!

Nuusbrief van Agter-Paarl Geloofsgemeenskap
Johannes Nortier

Nuusbrief Donderdag 15 Oktober 2020

Gedagte van die week:

Ek wil nie net 'n geloof besit nie. Ek wil 'n geloof hê wat van my besit neem. (Charles Kingsley)

Vertrekpunt:

1 Tessalonisense 1:1-10

Meditasie uit die teks:

Die Christelike geloof kan maklik verval in soetsappige romantiek. Dan word ons God se passiewe bedorwe brokkies wat ons besig hou met hemelse dromery! Ons brand kerse en deel rooi rose uit. Ons sing meesleurende liefdesliedjies op ligte wysies. Ons bou lekker verhoudings en hou lekker geselsies. En dit is natuurlik nie alles verkeerd en sleg nie, want ons is na alles ook emosionele wesens, maar ons geloof, liefde en hoop moet meer wees as net dit. Paulus gebruik in ons teks woorde soos werk, inspanning en volharding. Dit klink bietjie meer na sweet as na "sweets". Dit klink bietjie meer na moeg gewerk as na lekker gekuier. So ons moet die balans hou, ons mag nie die vreugde verloor nie ... maar die vreugde moet diep wees en nie goedkoop nie. Geloofswerk vind plaas in **en** buite ons gemaksone. Liefdesinspanning reik uit na vriende **en** vyande. Hoop volhard in goeie **en** slegte tye. Die **en** is die uitdaging ...! Die geloof, hoop en liefde van 1 Kor 13:13 klink in 1 Tessalonisense 1:3 bietjie anders as gewoonlik!

Youtubeskakel:

Ons gaan voorlopig voort met ons Youtube-uitsendings. Jy sal een of ander tyd op Sondag, na afloop van ons reisgesprek by die kerkgebou, via whatsapp 'n Youtube-skakel ontvang.

Meditasie uit die lewe:

Die afgelope sewe dae werk ons tuinwerker en twee hulpe onverpoosd op ons grasperk in 'n poging om die onkruid onder beheer te kry, ek praat nie eers van uitroei nie. Ek staan by geleentheid na hulle en kyk en wonder hoekom die onkruid so maklik groei en die gras so sukkel. Hoekom vat die slegte en verkeerde so maklik oor en hoekom sukkel die regte en die goeie so om staande te bly. Die lewe, my lewe, jou lewe, ons lewens is ook maar soos 'n grasperk. En ons is almal tuinwerkers in ons eie en in mekaar se lewens. Ons roei en stoei met die onkruid en hoop die groen gras groei! Soms sien 'n mens kans daarvoor, maar ander kere wil jy moed verloor. Soos vandag ... ek het sommer vir Andries Oelofse gebel en gevra hy moet sy spuitmasjien bring en die onkruid kom spuit. Ek wonder wie sal ek bel oor die onkruid in my lewe. Sal maar vanaand bietjie stilword ... alleen in my binnekamer en vra dat God sy genade sal spuit op my grasperk. Ek wil 'n silwerskoon, grasgroen grasperk wees! Regtig.

Maar die (ver)duiwelse onkruid is altyd daar! **Gelukkig is God se genade altyd groter.**

Die toekoms! (lees asseblief hieronder ... belangrike inligting)

Dit is 'n dapper opskrif, want wat weet ons van die toekoms? COVID het ons geleer om nederiger en minder selfversekerd te wees. Die lewe gaan wel aan en ons moet probeer om aan te pas. Hier volg dan die nuutste en voorlopige reëlings vir ons reisgesprekke:

1. Ons begin **Sondag 18 Oktober 2020 om 09:30** met ons reisgesprekke in/by die kerkgebou.
2. Ons kan gemaklik 250 mense binne die kerkgebou ontvang en die res kan buite op die grasperk tussen die kerkgebou en skoolgebou sit. Die kerkgebou gooi 'n redelike area skaduwee tussen 09:30 en 10:30. Jy mag wel 'n sonsambreel of gazebo saambring as jy wil. Ons sal tuinbanke en stoele beskikbaar stel. Jy mag jou eie kampstoel bring as jy wil. Daar sal klank en beeld buite wees sodat almal alles kan hoor en die powerpoint kan sien. Julle mag

- komberse en kussings saambring as julle op die gras wil sit, want daar mag dalk bietjie dou op die gras wees. Nuwe tye bring nuwe maniere!!!
3. Op Sondag 18 Oktober sal ons na afloop van die reisesprek vir elkeen 'n klaargepakte boksie met lekkernye aanbied. Ons kuier dan sonder enige haas saam op die grasperke. Ons kyk mekaar weer met liefde in die oë!!!
 4. Aangeheg aan die nuusbrief kry jy 'n vorm wat vir elke motor wat opdaag ingevul moet word. Jy vul dit by die huis in en ons kry dit by jou by die motor. Ons word verplig om rekord te hou van wie almal bywoon. Daar sal wel ekstra vorms in die voorportaal wees vir diegene wat dit nie by die huis kan uitdruk nie. Jy mag ook sommer een neem vir die volgende reisesprek.
 5. Ons gaan nie saamsing nie, maar na mooi musiek luister.
 6. Ons gaan nie dankbewyse opneem nie. Ons verkies dat ons steeds voortgaan met EFT inbetalings. Indien jy nie 'n EFT kan doen nie, mag jy kontant in 'n koevert plaas en dit in die plastiekhouders by die deure plaas.
 7. Ons gaan almal 'n masker byderhand hê en dit met verantwoordelikheid dra en afhaal.
 8. Ons gaan ons hande saniteer by die aangewese punte.
 9. Ons gaan sosiale afstand respekteer. Ons mag wel in gesinsverband naby mekaar wees.
 10. Ons gaan nie handskud en drukkies gee nie (al wil ons hoe graag!)
 11. Daar sal wel kleuterkerk in die saal wees, maar geen kinder- en tienerbediening nie.
 12. Die Belydenisklas sal weer op 8 November in die sitkamer begin.
 13. **Ons wil GEDULDIG EN VERDRAAGSAAM wees met mekaar. Dit is vir ons almal vreemd, maar ons het mos genoeg genade gekry om genoeg genade te gee.**
 14. As jy enige vrae het, skakel gerus met Lise, Toit of Johannes. Welkom!

As jy hierdie epos foutiewelik ontvang of dit nie meer wil ontvang nie, stuur net 'n epos wat lui "kanselleer nuusbrief" na ngkagterpaarl@telkomsa.net of jjn1@telkomsa.net